




Kamis, 04 Pebruari 2021

Ogen: Matius 6: 11



Ncukupken Keperluan



Wolter Robert van Hoevelsi nggeluh sekitar abad 19, melala meteh kerna manusia ras keluhen-keluhen, emaka isuratkena sada cerita si judulna: Japane Steenhower, pemecah batu Jepang. Mbarenda pernah nggeluh sekalak pemecah batu si la tersinget gelarna. Ia sekalak pekerja keras, tapi sekali jadi rukur ia maka pendahinna e rendahkel. Ersa ia jadi bayak tapi ola min latih. Lewat me sekalak raja lengkap ras pengawal erkuda, emaka ia atena jadi raja. Ibereken malekat pemindonna. Tapi sekali jadi asum ia erdalam alu kereta kuda, payungna la banci mayungi ia emaka kena las matawari. dungna nina ateku jadi matawari. Pemindonna isehken malekat. Asum ia jadi matawari segumpal awan ngolangi sinarna emaka nina jadi awan atena. Pemindonna ibereken Malaikat. Awan pe reh galangna nusur me jadi udan. Ndekahsa udan banjir me, porak-poranda kerina si lit, batu ngenca la pecah. Emaka jadi batu ka atena. Asum ia jadi batu, reh me temanna si deban si pendahinna mecahkan batu. I je me ia sadar kerna kai si enggo ilakokenna. Dungna mindo ka ia mulihi jadi pemecah batu.

Manusia nggeluh la erpuas-puas. Salah sada faktorna eme kap bagi cerita ndai, sikap ate nggeluh, la kekurangan, gelah la eraru ate. Piah dungna lanai si inget maka situhuna kegeluhenta enda tetap bergantung sepeuhna man Tuhan. Nina Jesus: adi ertoto kam “bereken man kami nakan cukup i bas wari si sendah enda” (ay. 11) Adi tiap wari si belasken pertoton Tuhan. Kai ertina? Me tiap wari nge kita icukupken Tuhan? Kita ibereken Dibata kesehatan, gegeh, kepentaren. Enda kerina me dalanna maka kita banci erdahin, janah arah dahinta ibereken Tuhan pasu-pasuNa. Kata cukup situhuna kesedarenta maka geluhta i bas pengaturen Tuhan. IetehNa kai si perlu man banta, ietehna gegeh ras kengasupenta lako encukupi keperluan geluhta, ietehna kerina keterbatasenta ngelitken kerina siiperluken kita. Arah si e iajuk kita gelah tetap bergantung man Tuhan ulu geluhta ras kegeluhen doni enda. Tek kita maka tiap wari kita ipeliharaNa alu mereken nakan cukup, mereken kesehatan cukup, mereken rejeki cukup. Kalak si nggejapken pemere Dibata e cukup bas kegeluhenna e nge si beluh ngatakan bujur.

☞ Tuhan nikapken cukup keperluan geluhta